

Enfin ch'il zerclim smarschescha sin il cumpost!

DA VIOLA CADRUVI*

Avant in onn essan nus ans pre-paradas per far pirir il patriarcat. Nus avain semtgà noss guaffens, nossas bandieras, noss t-shirts e banners. Nus ans essan radunadas per metter in signal, dapertut en Svizra, nus dunnas*. Nus avain fatg chauma per egualitad, medemas pajas, meglras cundiziuns da lavur, meglra e pli accessibla tgira d'uffants, encunter violenza, ingiustia, encunter il patriarcat e per in meglia futur per nus e tuttas* che vegnan suenter nus.

Jau na sai betg dir tge ch'era il meglia lez 14 da zercladur 2019. Che mintga dunna ch'jau entupava a Turitg sin via ma surrieva e salidava? Che mia mamma era là, mias amias, tudestgas e rumantschas, dunnas veglias e giuvnas, faschond chauma cun mai? Co in'amia marschava, tegnend

ina tavla ad aut, cun venter tut radund, lien sia figlia nunnaschida? Co la dunna en sutga cun rodas vegniva mintga pèr meters spustada d'in'otra chaumista? Cura ch'jau steva sin la balustrada al Limmatquai e veseva tut questas dunnas, millis e millieras, in'unda violetta che superava la citad? L'unitad? La forza? Il sentiment da far part d'insatge pli grond, d'insatge decisiv ed impurtant?

Ed uss, in onn pli tard? Ina chauma sco avant in onn para pli che pauc probabel. E mo memia gugent schess jau che quai saja perquai ch'i sa saja midà talmain bler. Ma gliez n'èsi betg. Las ragischs dal patriarcat van lunsch en il fons ed èn grevas da zerclar. Ed uss è qua quest stoda virus ch'impedescha nus d'ans radunar, da protestar, d'ans unir danovamain quest zercladur. El tegna nus a chasa, tgirond uffants, faschond paun da bananas, schubregiond la

cuschina per la 20avla giada – enavos en ils onns 50. «I can't believe I still have to protest this shit» steva sin il placat d'ina dunna veglia a la chauma avant in onn, e mia cuschina superschubra ma fa temair che quai saja stà ina sort invista en mes futur. Che nagut na vegnia a sa midar, ch'i vegn en il cuntrari mender.

Ma igl ha dà midaments! Mai n'èran professiuns «femininas» talmain impurtantas: tgira, commerzi en stizuns, las uschenumnadas «professiuns cun relevanza per il sistem» n'han mai survegna talmain blera atenziun e stima. Il respect per mussadras e canortas n'era probabel mai uschè grond sco ussa cura che tuts avevan da guardar sezs da lur uffants, e quai 24/7. E tuttenina na paran perfin homeoffice, temp da lavur flexibel e parzial betg pli talmain impussibel – ni per dunnas ni per umens.

Avant in onn essan nus idas sin via, sco gia memia bleras generaziuns avant nus. E tuttina na faschess jau nagut pli gugent che puspè vegnir ensemen cun tut questas dunnas*. Jau hai avunda da mia cuschina e da paun da bananas. Jau less puspè sentir l'unitad, la forza da quest 14 da zercladur 2019! Ed i dovra franc anc pliras rundas da zerclar fin ch'il patriarcat smarschescha sin il cumpost, pia èsi da tegnair en salv noss guaffens, bandieras, t-shirts. Tgi sa, forza ch'il virus ha fin il zercladur 2021 attatgà in pau questas ragischs profundas, uschia ch'jau na stoss en 50 onns betg ir sin via cun in placat che di: «Betg da crair ch'jau stoss anc adina protestar encunter questa grascha!»

***Viola Cadruvi ha studegià germanistica, istorgia e rumantsch a l'Universitad da Turitg. Actualmain scriva ella ina dissertaziun davart la feminitad en la litteratura rumantscha contemporanea.**

Vuschs da dunnas



(fmr/dat) Quest'emna avant in onn era l'entira Svizra violetta – en vista als 14 da zercladur 2019, en vista a tut las manifestaziuns da dunnas en Svizra. L'entir pajais era vi da discutir davart la rolla da la dunna en la societad, l'egualitad da pajas e la represchentananza feminina en la politica.

Ed uss, in onn pli tard? Tge è restà? Tge è sa midà? Tge sto anc sa midar? – La FMR lascha vegnir a pled quest'emna, en vista als 14 da zercladur da quest onn, mintgadi ina vusch da la dunna.